

Lu djâbe maçon.

Gaston LUCY - Presse-Annonces - 23 mai 1974.

La lontimps alèz, ku ç' t' afwêre-là s'è passé. Chûrmint des sièkes. Çut' anéye-là avot sté fwârt mwêje. Il avot plû d'abôrd tout l' timps jusk' à bin' avant dins l' mwès d'sètambe, si bin k' toutes les r'coltes astint pou insi dîre foutûes.

Insi, pour l'fûr, wê, on n' è sù z-a r'mète in cojê. Il è poûri s' les tchamps. Tourtous astint bin dèsolés.

In djon.ne cinsi, k'astot marié dupwis wêre du timps, s' à- nè co sintu d'pus k' les z-ôtes, i comptot toudi rawè l'solê et i n'avot co pon bâti d' grègne.

Lès vîs du viadje lî avint dné à consèy :

—Va survèy.î tes z-oumes, tes ovrîs dins les tchamps, L'ouÿ du mwêsse vât la mitan dul récolte; coume ça, t' è pus d' djâbes, tu diminuwes la pârt du mèch'neu... et tu dène in trwâjime brès âs cîs k' t' ocupe, cand i t'savat avâ-la.

Èt il è choûté les consèys des blancs tchfès.

Mês, l'anéye astot si manre ku lès cîs k' avint câzé et apêchî lu djon. ne du bâti sa grègne, à n' vlant nin l'êdî èt à lî lêchant tirer s' plan tout seû, avint sté, pou insi dîre, câze du sa rwîne.

In djoû k' i ruv'not bin trisse et bin hodé à sa mâjon, lu grand Prospèr, coume on l'loumot, tûzot à tous ses maleûrs. I s' dijot k' i n' tirrot nin djà 100 francs du toutes ses danrées, k'i n'sârot jamwès payî ses rindadjes et k' il alot z-esse oblidjî du s' louer dins les cinses, si on vlot bin d' loû. C'est nin tant pour loû k' i s'catibulot, mès pou sa fame et leu ptit valèt. I gn' è brâmint k' ârint sté dins ç cas-là, k'ârint mâ toûrné.

Il è sté s' acwati dzous in tchène, pîs il è rèchu l' coutê, il è sté in moumint coume fô, i n'savot kwè fwêre à wêtant l' coutê, pîs i l' è r'mètu al potche et i s' è rluvé pou z-araler. A ç'moumint-la, il è atindu router drî loû. Èn' oume l' è ratrapé et lî è dmandé lu tch'min du tchestê des Rnôds. Lu cinsî n' l' oyot nin et il è falu k' l' ôte rèpète pus d'in côp la kèstion.

Al fin, l'cinsi lî è ruspondu:

—Sièz m', dju v' z-î mon'rê.

Il avot bin vu k' l' oume duvot z-esse ritche, a vèy ses mouss'mints. Et l'cinsi routot l'prêmî. Tout d'in cöp, l'ètranjêr è dmandé insi ou cinsi :

— Camarade, t'è l' êr bin tapé, t'è yu dul malchance?

—Ahy, dit-i l'cinsî, dju nn'ê yu à câze ku dj'ê choûté des mwès consèys. Cand ma grègne srè finîe, dju n'ârê pus ku dl' ancine à z-î mète, à câze du timps k' i fwêt.

La-dsus, l'ètranjêr è tchandjî d'couleûr et i tran.not.

Lu cinsî è crû k' ça lî fjot yâk, à l' ôte, et il è rataké à lî conter ses maleûrs.

—Ahy, dju wès bin k' t' ès dins ène lêde passe, et dju n' wès k' in mo.yin pou z-a rèchu.

—In moyin?, dit-i l'cinsî, dijèz vite. Cand dj' duvros z-î lêchî la hozète, dju sayrê tout, pou l'bin d'ma fame et d'nost'afant.

— Et bin!, dins ç cas-la, k' i dit sètch'mint l'ôte, dju m'vas t'duner 2.000 francs, dju frê achèver ta grègne et dju la bôr'rê du mèyeu grin, ku tu pôrès r'vinde bin chér, ca i va z-esse rukèru.

—Ku l'Bon Dju vous l'rinje, boun' ètranjêr, dju v' z-a srè r'counichant, et ...

Tout d'in cöp, i s'è arété wake du câzér. La lune vinot du s'moustrer, et al luweûr, lu cinsi , à wêtant l'ètranjêr, è crû vèy in ruv'nant ki riot d'loû.

Tout d'in côp, l' sègneûr lî dit :

—I m' fât cand min.me des garanties, don ! Èsku t' vus fwêre in martchî avu mi ? Vla mes condicions, wê. Duvant ku l' cok nu tchante, t'ârez tout ç'ku dj' t' ê anoncî, tu srès m' cinsî; Jure-mu du vnu dins èn'an à m'chestê.

—C'èst lon, ça ? k'i dit l'cinsî.

— Nin co ène eûre du voye !

— Nin co ène eûre ? nin co èn'eûre? k' i dit l'cinsî. Dju nul counus nin ... et pourtant, c'èst nin lon, ça, ène eûre ! Putète k'il est nouvê ? Anfin, mês i m' fârèt ène mājōn pou ma fame et nosse gamin; ca, is vèront avu mi.

L'étranjer avot bin du mâ d' s' aspêchî d' rire a wèyant la bêtise du cinsî..

—Mets la fame et l'afant sul contrat, t' ârès 2.000 francs d' pus pou la fame et 1.000 francs pou l'afant.

— Martchî fwêt, dit-i l'cinsî; Alans amon l'notêre !

— Nin dandjî d'notêre, dj'ê tout ç'k'i fôt sur mi; d'ayeurs, dj'ê dja piêrdu trop d'timps avu ti et dj'vôros djà bin z-esse ruvôy, ca c'est in bin ptit martchî k' dju v'nans d' fwêre. Seûlmint, pou scrîre, i fârèt k' tu t' fwêjes in pô singnî ou brès.

—Swat', dit-i l'cinsî.

Lu contrat fini et parafé, les sous comptés, l' étranjer è nn' alé après l' chèstê dès rnôds. Tou d'in côp, on n'l'è pus vû sul pazê èt ça è bin intrigué l'cinsî. Ké sègneûr ku ç'astot, ça ??? Putète d'in nouvê tchêstê, mês i n'avot nin dit l'nom. Après tout, 4.500 francs, la grègne finie et plin.ne du bon grin, lu cinsî nu wèyot nin poukwè k' i s' ârot co plindu, et i è ralé à sa mājōn. Là, il è vu lès ovrîs achèver la grègne à ène vitèsse ... et ç'astot ène putite roudje lumîre ki les lumot, mês on n'wèyot nin d'èyû k' ile vunot. Et on n'atindot rin, nin in côp d'martê, nin ène soliète; ç'astot bin louche... Ça è fwêt rèflèchi nosse cinsî, k' è bintot c'mincî à z-awè peû. Sa fame ossi astot toute dènotée. Min.me ses ovrîs cāzint dul kiter. Lès tchins ahoûlint, les z-ôtes biêsses dul cinse tran.nint ossi, iles sayint d'aratchî leus loyins pou sêwer.

Mês dins lu stâle, i gn'avot in cok, lu pus bê du payis, nwâr et roudje, amiteiu surtout avu la fame. Il astot co pus sèré k' lès z-ôtes. Tout d'in côp, il è volé sul djèron dul fame, i s'î è crû à kwète et il è tchanté in bon côp.

Ossi vite, z-è atindu coume in côp d' tounoûre, les maçons s' ont sâvé sins achèver la grègne.

À matin, c'est les vèjins k'à n'ont fwêt, des ouys, à wèyant la grègne d'abôrd fwête et djà plin.ne du bê grin ; lu cinsî n'plot mâ d'a dire du trop ; i savot bin, asteûre, k'il avot yu afwêre ou djabe.

Il è sté à c'fèsse dulé in vî blanc mwane et lî è tout raconté, bin pon.neu du bête martchî k'il avot fwêt.

Pus târd, il è volu achèver l' volé ku l' djabe n'avot nin fini. I gn' è jamwès ène pîre, ni ène brike k' è volu d'mèrer ou mèr; et la grègne è toudi d'mèré insi.

Èt c'èst d'adon k' les coks tchantat dvant l'djoû, pou tchèssî l'djabe k' ârot vnu fwêre des martchîs avâ-la, tins d' parnute.

Lu cinsî, loû, è moru bin vî, coume tous les sènes, an bons pratikants , k'avint vû l'djabe d'in pô trop près.

Gaston LUCY.

Raponti.yî pa Louwis BEDJOT, lu 10 du mars 1998.